

Kommunit aqunneqarnerat pillugu Inatsisartut inatsisissaattut siunnersuut
Nunami Namminermi Pissutsinut, Pinngortitamut Avatangiisinullu Tunngasunut Naalakkersuisumit saqqummiunneqartoq

pillugu

Nunami Namminermi Pissutsinut Ataatsimiititaliap

ISUMALIUTISSIISSUTAA

Siunnersuutip aappassaaneerpeqarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Isak Hammond, Inuit Ataqatigiit, siulittaasoq
Inatsisartunut ilaasortaq Astrid F. Rex , Demokraatit, siulittaasup tullia
Inatsisartunut ilaasortaq Kaali Olsen, Inuit Ataqatigiit
Inatsisartunut ilaasortaq Hans Enoksen, Siumut
Inatsisartunut ilaasortaq Kristian Jeremiassen, Siumut

Ulloq 7. oktober 2010-mi UKA2010-p siullermeerneqarnerata kingorna ataatsimiititaliap siunnersuut misissorpaa.

Siunnersuutip imarisaa siunertaalu

2009-mi kommunit kattunneqarneranni kommunit aaqqissuussaannerat allanngortinneqangaatsiarpoq. Ukiuni kingullerni marlunni kommunini aaqqissuussinernit misilittagaalersimasut tunngavigalugit kommunini aqutsinerni maleruagassat allanngortinneqarput. Taamaalilluni aqutsinermik inatsit naleqqussaavigineqarpoq tamannalu kommunit ilaatigut kissaatigisimavaat.

Kommunit aqunneqarnerat pillugu Inatsisartut inatsisaannut 5. december 2008-meersumut tunngatillugu ilaatigut kommunalbestyrelsini ilaasortat kommunalbestyrelsit ataatsimiinneranni peqataasimasut attaveqarnikkut teknologi atorlugu aalajangiinerit pillugit imaqarniliat atsiorinnaalissagaat Inatsisartut inatsisissaattut siunnersuutikkut matumuunakkut siunnersuutigineqarpoq. Malittarisassat imaalillugit annertusineqarput atuuffimmi suliassat allat suliarinissaannut kommunalbestyrelsip suliassiiissutigerusutaannut kommunalbestyrelsimut ilaasortaangitsunik allanilli kommunalbestyrelsi toqqaasinnaangorlugu.

Aalajangersagaq nutaaq atuutilersinneqaqqippoq tassanilu ataatsimiititaliat aaqqissuussaane-rannik allannguisoqartillugu kommunalbestyrelsi qanoq aalajangiisinnaanersoq allassimavoq. Aalajangersagaq inatsimmi 2008-meersumi kukkunikkut peerneqarpoq. Aalajangersagaq inat-simmi 2008-meersumi kukkunikkut peerneqarsimasoq nutaamik iluarsineqarpoq. Aamma-taaq nunaqarfinni aqutsisut siulittaasuunik qinersisarneq pillugu malittarisassat allanngortin-neqarput. Siulittaasup ilaasortallu pingasut pisariaqartippassuk Nakkutilliisoqarfik qanorluun-niit akulikitsigisunik ataatsimiittassasoq aamma inatsimmi siunnersuutigineqarpoq, tassalu Nakkutilliisoqarfiup ukiumut minnerpaamik ataasiarluni ataatsimiittarnissaa piumasaqaataa-junnaarluni.

Siullermeerneqareernerani allannguutissatut siunnersuutigineqarpoq “Kalaallit Nunaanni Nu-nap eqqartuussisuunerata Nakkutilliisoqarfiup siulittaasuunik taassumalu ataatsimik arlalinnil-luunniit tullissaanik toqqaassaaq, tamarmillu inatsisilerituutut soraarummeersimasuussapput.”

Inatsisartut siunnersuummik siullermeerinninnerat

Siunnersuummi siunniussat ilusilerneqarnerattut partiinit tamanit taperserineqarpoq.

Aammattaaq § 31 naapertorlugu ataatsimiititaliani immikkut ittuni sulinermut kommunalbes-tyrelsit akissarsititsisarnissaat kiisalu ilaasortanut ingerlatsitseqqinnerit tamarmik elektronis-kimik pisassasut inatsisissatut siunnersuummi ilanngullugu allanngassasoq ataatsimiititalia-mi ilaasortat kissaatigaat.

Akerlianilli Naalakkersuisut allannguutissatut siunnersuutaannut atatillugu partiit akornanni isumaqatigiinngittoqarpoq. Nakkutilliisoqarfiup siulittaasuata siunissami inatsisilerituujusar-nissanik siunnersuut Inuit Ataqtiginnit Kattusseqtigiiit Partiiat peqatigalugu, Demokraatinit Atassummiillu tapersersorneqarpoq. Tassunga atatillugu Nakkutilliisoqarfimmi ilaasortat i-natsisilerituutut aningaasaqarnikkullu ilinniagaliuppata tamanna Nakkutilliisoqarfiup suline-ranut suli nukittorsaataasasoq Inuit Ataqtigiiit Demokraatillu isumaqarput.

Akerlianilli Naalakkersuisut Siulittaasuat Nakkutilliisoqarfimmi siulittaasuujuassasoq Siumut isumaqarpoq. Kommunit suliaat kommunillu sunniutilimmik nakkutiginerat pillugu Naalak-kersuisut qanimut malinnaasarnissaat Siumup pingaaruteqartut isumaqarfigaa.

Naalakkersuisumik apersuineq:

Ataatsimiititaliap siunnersuummik suliarinninneranut ilaatillugu Nunami Namminermi Pissut-sinut, Pinngortitamut Avatangiisinullu Tunngasunut Naalakkersuisumik ataatsimiititaliaq a-persuivoq. Naalakkersuisumik apersuinissamut aggeqqusissutip assilinera ilanngussatut ilan-ngunneqarpoq. Naalakkersuisunut ilaasortap apersorneqarnissaminut oqaasissani pappiaqqa-mut allassimangilai. Aalajangersakkat sorliit inatsimmut atuuttumut sanilliullugit imarisa-mikkut allanngortinneqarsimanerannut takussutissiaq apersuinermi atugassatut suliarineqar-

simavoq. Takussutissiaq isumaliutissiisummut matumunnga ilanngunneqanngilaq, tassa allannguutit imarisaat isumaliutissiisummi ilanngullugit nassuiaatigineqarmata.

Inatsisip Atortinneqarneranut Ataatsimiititaliap siunnersuummik suliarinninnera

Periaatsit malillugit siunnersuutip ilusilerneqarnera:

Suliami atortut kommunalbestyrelsip suliarinninnissaanut tungaviusut pillugit kommunalbestyrelsimi ilaasortat ataasiakkaat annertusisamik misissorsinnaalissagaat inatsimmi siunnersuutigineqartoq nassuiaatini nalinginnaasuni oqaatigineqarpoq. Kommunalbestyrelsip ataatsimiinnissaanut oqaluuserisassat sulianilu atortut ilaasortanut qaqugu nassiunnissaannut piffissaliussat inatsisissatut siunnersuummiittaaq ilanngunneqartut oqaatigineqarpoq. Aamma suliat kinguartinneqarsinnaanngitsut imaluunniit nalorninissamut pissutissaqartitsinngitsut pillugit aalajangiinerit kingorna borgmesterip kommunalbestyrelsimut ilisimatitsissutigisassagai siunnersuutigineqarpoq.

Ataatsimiititaliap suliarinninnerata nalaani immikkoortut siuliani saqqummiunneqartut inatsimmi atuuttumi: kommunit aqunneqarnerat pillugu Inatsisartut inatsisaanni nr. 14, 5. december 2008-meersumi ilanngunneqareersimasut Nunami Namminermi Pissutsinut Ataatsimiititaliap maluginiarpa.

Aammattaaq malittarisassat aalajangiuteriikkat ingerlateqqinneqarsimasut aalajangersakkat ataasiakkaat pillugit nassuiaatit immikkut ittut atuernerannit erserpoq.

Taamaattumik nalinginnaasumik nassuiaatit aamma inatsisissatut siunnersuummut nassuiaatit immikkut ittut naapertuutinnginnerat isornarluinnartuusoq ataatsimiititaliaq isumaqarpoq. Taamaattumik *imm. 2.2 Kommunalbestyrelsip aamma 2.3 Borgmesterip borgmesterillu tulliaata atuunnerat* nassuiaatini nalinginnaasuni allannguutit taaneqartut inatsit manna tunngavigalugu allanngortinneqarsimasutut oqarneq eqqortuunngimmat ataatsimiititaliap erseqqissassavaa, oqaatigineqareersummi inatsimmi atuutereermata.

Aammattaaq ataatsimiititaliap malugeqqussavaa aqutsineq pillugu inatsimmi nutaami inatsisaasimasumut sanilliullugu siunnersuummi § 34, imm. 1, immikkoortut aappaanni oqaaseqatigiit ataatsit peerneqarmata. Taamaalilluni oqaaseqatigiit uku peerneqarput "*aammalu suliasat allat kommunalbestyrelsimit imminnut suliasanngortitaasut ingerlannissaannut.*" § 34, imm. 1-imi oqaasertat inatsisissatut siunnersuutikkut allanngortinneqarnerat aalajangersakkamut immikkut nassuiaammik oqaatigineqanngilaq. Taamaattumik inatsisip suliarinerani ajuusaarnartorujussuarmik kukkusoqarsimasoq ataatsimiititaliap ilimagisariaqarpa. Aammattaaq § 44, imm. 3-mi kukkusumik innersuussisoqarsimasoq ataatsimiititaliap maluginiarpa, tassaniki § 42, imm. 3 eqqortumik innersuunneqarsimasussaagaluarpat.

§ 34 aamma 44-mi kukkunertut paasisat pingajussaaneerinnginnermi naqqiissuteqarfigalugit allannguutissatut siunnersuummik Naalackersuisut saqqummiussissasut Ataatsimiititaliap inassutigaa.

Allannguutissatut siunnersuut siuliani pineqartoq pingajussaaneerneqannginnerani Naalackersuisut saqqummiutilersaerneritsik uppersarsassagaat ataatsimiititaliap qinnutigaa.

Aamma inatsississatut siunnersuummi tassungalu tunngasuni nassuiaatini inatsisilerinikkut amigaatit tusarniaaffigisat amigaatit uparuagaat kingorna tamakkiisumik naqqinneqarsimannginnerat ataatsimiititaliap assut isornartoqartippaa.

Siulittaasup Naalackersuisoqarfia assersuutigalugu makkuninnga nassuiaateqarpoq:

"Inatsisilerinermut Allaffiup inassutigissavaa siunnersuut Kalaallit Nunaanni Namminersorlutik Oqartussani inatsississatut siunnersuutitut taakkunungalu oqaaseqaatinut tunngatillugu malittarisassanik suliarinninnermi maleruagassat naapertorlugit oqimaaqatigiissarneqassasoo. Siunnersuutip ilusilersornera maleruagassanut oqimaaqatigiissarnissaa immikkut ittumik pisariaqarpoq. Taassuma saniatigut oqaaseqaatit allannguutissatut siunnersuutitut ilusilersorneqarsimasutut isigineqarput. Tamanna eqqunngilaq, uanimi pineqarpoq inatsimmik pingaarnermik nutaamik saqqummiussinissaq."

Nassuiaatit tusaatissatut tusarniakkanit tiguneqarnerat Ataatsimiititaliap maluginiarppaa. Inatsisaasimasumit ingerlateqqitat allannguutillu suut inatsisip pingaarnep nutaap matuma saqqummiunnerani allannguutigittinneqarsimanersut eqqarsaatigalugit siunnersuut kukkuneqartutut isikkoqartoq nassuiaatillu erseqqarluttorujussuurtut malunniuttut Ataatsimiititaliap isumaqarpoq.

Nassuiaatit nalinginnaasut kukkunillit ilanngullugit inatsimmi oqaasertaasimasunut atatillugu aalajangersakkat sorliit tigussaasumik allanngortinneqarsimanersut Ataatsimiititaliap oqaatigisariaqarsoraa.

§ 15, imm. 2-mi maanna kommunalbestyrelsimi tunuarnissaq pillugu allakkatigut qinnuteqaateqarnissaq piumasaaqatigineqarpoq.

§ 16, imm. 1 oqaaseqatigiinni siullerni aalajangiinerit pillugit imaqarniliap atsiornissaanut atatillugu oqaaseq "piaartumik" peerneqarpoq.

§ 16-imi § 16, imm. 3 ilangunneqarpoq. Aalajangersakkami attaveqarnermi teknologit ator-nissaannut kommunalbestyrelsimi ilaasortat periarfissinneqarput.

§ 31, imm. 4-mi immikkoortumi kingullermi "kiisalu"-mik aallartittoq ilanngunneqarpoq. Taamaalilluni sinniisuutitat aamma kommunalbestyrelsimi qinikkatut suliaassanik suliaqarsinnaalerput.

Ataatsimiititaliat aaqqissuussaananeriniq allannguisoqartillugu kommunalbestyrelsip aalajangii-neri pillugit § 33 tamarmi atuutilersinneqarpoq.

§ 34, imm. 2 peerneqarpoq, taamaalilluni qinikkatut suliaassanik kommunimi najugalinnut allanut kommunalbestyrelsi isumagisassanngortitsisinnaajunnaarsillugu.

§ 48-mi "naalagaaffimmit akuerisaasoq" "kukkunersiuisoq"-mut allanngortinneqarpoq.

§ 49-mi "naalagaaffimmit akuerisaasoq" allanngortinneqarpoq "kukkunmersiuisarfik akueri-
saasunngortillugu".

§ 51, imm. 3 allanngortinneqarpoq nunaqarfimmi aqutsisut siulittaasuannik qinersineq pillugu malittarisassat immikkoortortalersugaajunnaarsillugit.

§ 61 "siulittaasup imaluunniit ilaasortat pingasut pisariaqartippassuk qanorluunniit akulikitsi-
gisunik Nakkutilliisoqarfik ataatsimiittassaaq"-mut allanngortinneqarpoq. Taamaalilluni Nak-
kutilliisut ukiumut ataasiarlutik ataatsimiittarnissaat piumasaqaataajunnaarpoq.

Tamatuma saniatigut Nakkutilliisoqarfiup siulittaasua aamma taassuma sinniisussaa ataaseq arlallilluunniit tamarmik inatsisilerituutut soraarummeersimasussat Kalaallit Nunaanni Nuna Tamakkerlugu Eqqartuussisumit toqqarneqartassasut inatsimmik allannguutissatut siunner-
suutikkut atuutilersinneqarpoq. Allannguutissatut siunnersuutip assilinera ilanngussatut ilan-
ngunneqarpoq.

Nakkutilliisoqarfik:

Nakkutilliisoqarfik ukiumut minnerpaamik ataasiarluni ataatsimiittarunnaassaasoq, akerlianil-
li siulittaasup imaluunniit ilaasortat pingasut pisariaqarsorigaangassuk qanorluunniit akulikit-
sigisumik ataatsimiittoqartalissasoq siunnersuutigineqarpoq.

Tassunga atatillugu *Konto pingaarneq 10.01.10 Kommunit Nakkutilliisoqarfiat* pillugu UKIU 2006/16-p aappassaaneernissaanut Aningaasaqarnermut Ataatsimiititaliap isumaliutissiissutaa
ataatsimiititaliap innersuussutigaa. Nakkutilliisoqarfiup suliaasa killiffiat pillugu Aningaasa-
qarnermut Ataatsimiititaliaq isumaliutissiissummi, tassani Nakkutilliisoqarfik ukiumi kingul-
lerni marlunni qasseriarluni ataatsimiissimanersoq ilanngullugu apeqputigineqarpoq. Aam-
mattaq massakkut susassaqarfik assersuutigalugu inatsisinik atortitsinerumut susassaqarfim-
mut nuunneqarpat iluaqutaassanersoq Aningaasaqarnermut Ataatsimiititaliap paaserusuppa.

Isumaliutissiissuttip 16. marts 2006-imi aappassaaneerneqarnerani oqaatigineqartutut taamani
Naalakkersuisuusut imatut akissuteqarput:

*"Nakkutilliisoqarfik pisariillisaaniarluni Inatsisartut ataatsimiinnerata nalaani ataatsimiittarpoq.
Oktober 2004-mi ataatsimiittoqarpoq, kisiannili 2005-imi upernaakkut ataatsimiinnerup nalaani a-
taatsimiinnissaq pilersaarutaagaluortoq Inatsisartut ataatsimiinneranni allanik ulapputeqarneq patsi-
sigalugu taamaatiinnartariaqarsimalluni. Kisiannili ataatsimiinnissami pilersaarutaagaluami aalaja-*

ngigassanik suliassaqsimanngilaq, taamaallaat ilisimatitsissutit oqallisissaasimallutik. 2005-imi ukiakkut ataatsimiinnerup nalaani ataatsimiinnissaq pilersaarutigineqaraluaq Inatsisartunut qinersi-soqartussanngornera pillugu taamaatiinnarneqarpoq. “

Tassunga atatillugu massakkut susassaqarfik assersuutigalugu inatsisunik atortitsinermut susassaqarfimmut nuunneqarpat iluaqutaassanersoq pillugu apeqqut Naalakkersuisut akissuteqarfingngilaat.

Tamanna tunngavigalugu Aningaasaqarnermut Ataatsimiititaliaq ima inerniliivoq:

“Maannakkut periuserineqartoq ingerlanerlussorinartutut Aningaasaqarnermut Ataatsimiititaliamit isumaqarfigineqarmat periuserineqartup allatut aaqgissuuteqqinneqarnissaa Naalakkersuisunut inas-sutigineqassaaq. Kiisalu Nakkutilliisoqarfiup amerlanerusunik ataatsimiitarnissaq siunissami anguniassagaa ataatsimiititaliap kiisalu Nakkutilliisoqarfiup ersarinnerulernissaa qulakkeerneqassasoq aamma inassutigissavaa.”

Siunnersuutip pingajussaaneernissaanut massakkut susassaqarfik assersuutigalugu inatsisunik atortitsinermut susassaqarfimmut nuunneqarpat iluaqutaassanersoq pillugu apeqqut Naalakkersuisut akissuteqarput. Tassunga atatillugu Naalakkersuisut ilaatigut imatut oqaaseqarput:

“Nakkutilliisoqatigiit ingerlatsineq annertusarusuppaat, ilaatigut kommunit ataatsimeeqatigikulanerneratigut ataatsimiittarnerillu allat amerlanerulersinneratigut Nak-kutilliisoqarfiullu saqqumilaarnerulerneratigut. Tamanna tunngavigalugu Naalakkersuisut AIS 2006-p pingajussaneernissaanut allannguutissamik siunnersuuteqarniarput. Tassami ingerlatsinerup annertusinera akissaajaateqarnerulernermik kinguneqartussaassamat.”

Pingajussaaneerinninnermi Naalakkersuisut akissuteqaataat aamma aappassaaneerinninnermi Aningaasaqarnermut Ataatsimiititaliap inerniliinera tunngavigalugit Nakkutilliisoqarfiup ukiumut arlaleriarluni ataatsimiittarnissamik ujartuinera suliallu amerlisinnerisigut Nakkutilliisoqarfiup tusarsaanerulernissaa pingaaruteqarmat Nunami Namminnermi Pissutsinut Ataatsimiititaliap naqissusissavaa.

Nakkutilliisoqarfiup siulittaasua taassumalu sinniisussaa ataaseq arlallilluunniit tamarmik inatsisilerituutut soraarummeersimasut Kalaallit Nunaanni nuna tamakkerlugu eqqartuussisup toqqartassagai siunnersuutip siullermeerneqareernerani Naalakkersuisut siunnersuutigaat.

Allannguutissatut siunnersuutit pingaaruteqarpallaanngitsut qaqutiguinnaq tusarniaassutigineqartarnerat ataatsimiititaliap arajutsisimanngilaa. Ataatsimiititaliarli isumaqarpoq allannguutissatut siunnersuut una ima pingaaruteqartigisoq tusarniaaffigisassanut susassaqartunut tusarniaassutigineqarluarsinnaagaluarluni. Ataatsimiititaliarli isumaqarpoq KANUKOKA tusarniaaffigineqartariaqanngitsoq, KANUKOKA-mi Nunami Namminnermi Pissutsinut Ataatsimiititaliamik ataatsimeeqateqarnermini oqarmat allannguutissatut siunnersuut kattuffiup suliassaannut tunngassuteqanngitsoq taamaattumillu isumaqarluni kattuffimmu tusarniaassutigineqartariaqanngitsoq.

Taamaalilluni allannguutissatut siunnersuut aqqutigalugu Nakkutilliisoqarfiup siulittaasuanik taassumunngalu sinniisussamik ataatsimik arlalinnilluunniit toqqaasarneq allaffissornikkut naalackersuinikkullu pituttorsimaneerutissaaq.

Siunnersuut Inatsisartunit akuersissutigineqarpat Nakkutilliisoqarfiup naalackersuinikkut sunnerneqarnera annikillisinneqassaaq inatsisilerinikkullu aaqqissuussaaneermik taarserneqasalluni. Taamaalilluni nakkutilliinermik oqartussat aalajangiisarneri naalackersuinikkut aalajangiisarnernik isumaqarfiginneerutissapput taamatut isumaqarneq tunngavissaqarnerseq tunngavissaqannginnersorluunniit apeqqutaatinnagu. Tamatumunnga peqatigitillugu qinersinissaq imaluunniit Inatsisartut ataatsimiinnerini ulapputeqarneq naalackersuinikkulluunniit suliat assingusut pissutigalugit Nakkutilliisoqarfiup ataatsimiittarneri taamaatiinnarneqartarunnaasapput.

Oqaatigineqarsinnaavoq nuna Danmarki sanilliunneqarsinnaasoq Nakkutilliisoqarfimmik atorrunnaarsitsisimammat. Nunami Namminermi Pissutsinut aamma Peqqinnissamut ministereqarfimmi saaffissatut siullertut aamma saaffissat tulliatut nakkulilliisoqarunnaarluni tamanna aaqqissuussinermik nutaamik taarserneqarpoq. Kommuninik nakkutilliinermi saaffissaq siulleq Naalagaaffiup ingerlatsisoqarfiini inissisimasimavoq tassani suliat inatsisilerituunit aalajangiiffigineqartarlutik. Atugarissaarnermut ministereqarfik saaffissat tullerisimavaat. Taamaalilluni naalackersuinikkut marlunnik saaffissaqartitaaneq qimanneqarsimavoq tassani naalackersuinnermut tunngasortaa saaffissaq siulleq peerneqarsimalluni saaffissalli aappaa attiinnarneqarluni. Tamanna imminnut tulluannigitsorujussuarmik inissisimalersitsimavoq. Tassunga atatillugu immikkut aalajangiisartoqatigiinnik inatsisilerituunik højesteretimilu eqqartuussisumik ataatsimik inuttaqartussamik pilersitsinissaq isumaliutersuutigineqarsimavoq, Danmarkimili inatsisilerinnerinnarmik periaaseqalernissaq amerlanerussuteqarfigineqanngilaq.

Kommunit aqunneqarnerat pillugu Inatsisartut inatsisaanni ataasiinnarmik naammagittaalliorfissaqarpoq, tassalu Nakkutilliisoqarfik. Siulittaasoq sinniisussallu inatsisilerituutut soraarummeersimasussat atuutilersinnerisigut nakkutilliinermi naalackersuinikkut attuumassuteqarfigisat peerneqassapput. Akerlianilli nakkutilliisut inatsisilerinikkut pisinnaasallit sulisorineqalissapput nakkutilliisullu sulineranni sapinngisamik annertunerpaamik akkaareqatigiinneq aamma nakkutilliisut suliaannut pituttuutaannginnissaa qulakkeerneqassalluni.

Nunami Namminermi Pissutsinut, Pinngortitamut Avatangiisinullu Tunngasunut Naalackersuisumik apersuinnermi allannguutissatut siunnersuutip tunngavia itisilerneqarpoq. Aaqqissuussineq ullumikkut atuuttoq, tassa Nakkutilliisoqarfiup siulittaasuata Naalackersuisut siulittaasuata inissisimasarnera ajornartorsiutaasarsimanngitsoq oqaatigineqarpoq. Kommunit kattunneqareerneranni kommuninut malittarisassat pisariunerulersimapput taamaattumillu Nakkutilliisoqarfiup siulittaasuata inatsisilerinermik pisariaqartumik pisinnaasaqarnissaa kommunillu piluugit inatsisunik paasisimasaqarnissaa pisariaqartinneqalersimavoq. Tamatu-

munnga peqatigitillugu kommunini malittarisassat siunissami suli pisariunerulissappata Nakkutilliisoqarfiup siulittaasuata inatsisilerinermik pisariaqartumik pisinnaasaqarnissaa taamaallilluni qulakkeerneqassasoq Naalakkersuisunut ilaasortaq isumaqarpoq. Tamatumunnga peqatigitillugu Nakkutilliisoqarfimmi aningaasarsiornermut tunngasunik qaffasissumik pisarialimmik paasisimasaqarnissaq pisariaqartinneqalissasoq naatsorsuutigineqarpoq.

Kommunit aqunneqarnerat pillugu Inatsisartut inatsisissaattut siunnersuut tunngavigalugu Nunami Namminermi Pissutsinut, Pinngortitamut Avatangiisinullu Tunngasunut Naalakkersuisumik apersuinermissaaq kommunalbestyrelsimi ilaasortat, borgmesterit, borgmesterit tullersortaat aamma Nunaqarfinni Aqutsisut siulittaasuisa aningaasarsiaqartitaaneranni siunissami suut allannguutaasussatut Naalakkersuisup naatsorsuutiginerai aamma oqaluuserineqarpoq. Tassunga atatillugu aqutsinermut inatsit akuersissutigineqareerpat aningaasarsiat pillugit nalunaarummi suut siunniunneqassanersut KANUKOKA-mut oqaloqatigiissutigineqarumaartut Naalakkersuisunut ilaasortap paasissutissiissutigaa. Tassunga atatillugu kommunalbestyrelsimi ilaasortaq qaammatinit marlunnit sivilunerusumik napparsimanini, ernisimanini meervavissartaarsimaniniluunniit pissutigalugit kommunalbestyrelsimi sulinermut peqataasinnaangippat sinniisussap kisimi kommunalbestyrelsimullu ilaasortaq pinnani aningaasarsiaqartitaanissaanik malittarisassat allannguuteqarnissaat Naalakkersuisunit naatsorsuutigineqanngitsoq ilaatigut paasissutissiissutigineqarpoq.

Aningaasaqarnikkut kingunerisassat:


Siunnersuutip aningaasaqarnikkut pisortanut kinguneqaateqassannginneranik ilismasunneq ataatsimititaliamittaaq maluginiarneqarpoq. Tassunga atatillugu siunnersuut ataatsimut tapiissutit isumaqatiginninniutiginissaannut attuumassuteqanngimmata ataatsimiititaliap oqaatigisavaa.

Ataatsimiititaliap inassuteqaatai:

Naalakkersuisut allannguutissatut siunnersuutaat akuersissutigineqassasoq ataatsimiititaliap isumaqatigiittup inassutigaa.

Naalakkersuisut inatsisip allannguutissaatut siunnersuutaat kingorna iluserilikkamisut iluseqarluni akuerineqassasoq ataatsimiititaliap isumaqatigiittup inassutigaa.


Allannguutissatut siunnersuutip taasissutiginerata kingorna Naalakkersuisut inatsisissatut siunnersuutaat iluserilikkamisut iluseqarluni akuerineqassasoq ataatsimiititaliap isumaqatigiittup inassutigaa.



Isak Hammond
Siulittaasoq



Astrid F. Rex
Siulittaasup tullia



Hans Enoksen



Kaali Olsen



Kristian Jeremiassen



INATSISARTUT

Ilanngussaq 1

Nunami Namminermi Pissutsinut, Pinngortitamut Avatangiisinullu Tunngasunut
Naalakkersuisoq
Anthon Frederiksen
/tunniunneqassaaq

Ulloq 19. okt. 2010
J.nr: 01.43.04-00001

**Nunami Namminermi Pissutsinut Ataatsimiititaliap pingasunngorneq 20. oktober 2010-mi,
nal. 7.30 – 8.30 Naalakkersuisumik apersuinissaanut ataatsimiigiaqussut**

Nunami Namminermi Pissutsinut, Pinngortitamut Avatangiisinullu Tunngasunut Naalakkersuisunut
ilaasortaq, Anthon Frederiksen, ataatsimiititaliamit apersorneqassasoq Nunami Namminermi
Pissutsinut Ataatsimiititaliap kissaatigaa.

Naalakkersuisumik apersuinermi makku oqaluuserineqassasut Nunami Namminermi Pissutsinut
Ataatsimiititaliap kissaatigaa:

UKA 2010/25 – Kommunit aqunneqarnerat pillugu Inatsisartut inatsisissaattut siunnersuut.

Inatsit atuuttoq tunngavigalugu kommunit aqunneqarnerat pillugu inatsisissatut siunnersuummi
allannguutissat pillugit nassuiaat.

Nakkutilliisoqarfiup siulittaasuanik sinniisussaanillu ataatsimik arlalinnilluunniit toqqaasarneq kiisalu
inatsisilerituutut soraarummeersimanissamik piumasaqaat pillugu § 60-imut atatillugu
allannguutisaatut siunnersuummut tunngaviusoq pillugu nassuiaat.

§ 15 malillugu sinniisussat pillugit malittarisassat, qaammatini marlunni sisamanilu piumasaqaatit
ilanngullugit atorneqarneqarnerannik nassuiaat.

Siuliani apeqqutit tunngavigalugit ilaatigut napparsimanermut atatillugu aningaasqarsiaqartitaaneq
kiisalu borgmesterit borgmesterillu tullersortaasa aningaasarsiaqartitaanerit oqaluuserineqassasut
ataatsimiititaliap kissaatigaa.

Nunami Namminermi Pissutsinut Ataatsimiititaliap sinnerlugu.

Isak Hammond

Siulittaasoq

7. oktober 2010

UKA 2010/25

Allannguutissatut siunnersuut

uunga

Uunga siunnersuut: Kommunit aqunneqarnerat pillugu Inatsisartut inatsisaat nr. xx xx xx 2010-meersoq

Nunamut Namminermut, Pinngortitamut Avatangiisinullu Naalakkersuisumit saqqummiussaq.

§ 60-mut

1. § 60, imm. 1, normu. 1 ima oqaasertaqassaaq:

” Nr. 1. Kalaallit Nunaanni Nunap eqqartuussisuunerata Nakkutilliisoqarfiup siulittaasuanik taassumalu ataatsimik arlalinnilluunniit tullissaanik toqqaassaaq, tamarmillu inatsisilerituutut soraarummeersimasuussapput.”

Allannguutissatut siunnersuummut oqaaseqaatit

Oqaaseqaatit nalinginnaasut

Nakkutilliisoqarfiup suliaqarnera annerpaamik kinaassusersiunnginnerpaajusumik isumannaarnissaa periarfissinniarlugu, Nakkutilliisoqarfiup siulittaasusnaanik taassumalu ataatsimik arlalinnilluunniit siulittaasup tullissaanik toqqaaneq Namminersorlutik Oqartussat politikikkut aaqqissugaaneraniit allaffissornikkulluunniit attaveqanngitsuutinniarlugu Naalakkersuisut kissaatigaat.

Nakkutilliisoqarfimmi inatsisilerinikkut nalinginnaasumik paasisimasat, kommuninilu inatsisitigut paasisimasat annertusineqassasut Naalakkersuisut nalilerpaattaaq.

Allannguutissatut siunnersuummi aalajangersakkanut ataasiakkaanut oqaaseqaatit

Normu 1-imut

Nunap eqqartuussisuunerata Nakkutilliisoqarfiup siulittaasusnaanik taassumalu ataatsimik arlalinnilluunniit siulittaasup tullissaanik toqqaanissamut siunertaasoq tassa, siulittaasumik qinersineq Namminersorlutik Oqartussat allaffissornikkut politikikkullu aaqqissugaaneranniit attaveqanngitsuutinniarlugu. Kommunini inatsisitigut paasisimasat Nakkutilliisoqarfimmi annertusiniarlugit siulittaasup taassumalu tullersortaasa toqqagaasut inatsisilerituutut soraarummeersimasuussapput.

Pissutsit, tassa Kalaallit Nunaanni Nunap eqqartuussisuunerata Nakkutilliisoqarfiup siulittaasuanik taassumalu tullersortaatus toqqagai tamarmik inatsisilerituutus soraarummeersimasuunissaasa, suliat Nakkutilliisoqarfimmi aalajangerneqarsimasut eqqartuussivinnut nalinginnaa sunut ingerlateqqinneqartarnissaat pinngitsoortikkunnaangilaat.